

# Was merr so babbelt

Honnes, hosdes schunn gelese?  
Ei was dann?  
Die Kronkekass soll deirer werrn.  
Wo stehden dess?  
In de Zeidung.  
So e Zeidung soll doch immer was Neies bringe.  
Ja unn?  
Dess iss doch nix Neies.  
Recht hosde, ess iss immer desselbe.  
No ja, mir werrn joo aach immer älder.  
Unn brauche immer mehr Medikamente.  
Unn immer mehr Ersatzteile unn desdeweeche ...  
... werrd die Kronkekass immer deirer. Logisch.  
Logisch. Awwer die werrd noch deirer.  
Ei warum dann?  
Weil mir immer mehr iwver Kronkheide babbele.  
Dess versteh ich nitt.  
Also: Wenn merr mehr babbele wisse merr mehr, odder?  
Dess iss richdisch.  
Babbele merr wenischer wisse merr wenischer, odder?  
Aach richdisch.  
Also wenn merr mehr iwver Kronkheide babbele, dann?  
Dann wisse merr mehr iwver Kronkheide!  
Unn wenn merr mehr wisse, dann?  
Dann hawwe merr aach mehr.  
Außerdem siehde jeden Daach was im Fernseh.  
Mir wisse vill iwver Kronkheide.  
Monchmol mehr als de Dokter.  
Doin Kumpel Fritz aus Raunemm sowieso.  
Ja, der sächtem Dokter immer wasser hott.  
Unn streit sich aach mett dem doorum.  
Unn wie. Weil dem soi Kronkheide oft oigebild sinn.  
Dass dem soin Dokter dess mettmache dut?  
Der muss, nooch dem was vorsjohr bassiert iss.  
Dess war joo aach e Ding. Wie war dess genau?  
Also: De Fritz aus Raunemm war zimmlich kronk  
unn doo hott soi Fraa de Dokter gerufe unn der  
iss aach kumme. De Fritz hott gonz blass im Bett  
geleeche unn hott sich nitt gerührt, doo hottem  
de Dokter de Puls gefielt unn dann gesaat: Lieb  
Fraa, ihrn Fritz iss doot. In dem Aacheblick hott de  
Fritz die Aache uffgerisse unn geflistert: Awwer ich  
leb doch noch! Doodruffhie hott soi Fraa gesaat:  
Fritz, jetz iss awwer Schluss, immer mussde alles  
besser wisse wie de Dokter.

Eiern Honnes